

Na osnovu člana 56. stav 2. *Zakona o organizaciji organa uprave u Federaciji Bosne i Hercegovine* ("Službene novine Federacije BiH", broj: 35/05) i člana 34. stav 6. *Zakona o šumama* („Službene novine Zeničko-dobojskog kantona“, broj: 8/13) ministar Ministarstva za poljoprivredu, šumarstvo i vodoprivredu Zeničko-dobojskog kantona, donosi:

P R A V I L N I K

o načinu obilježavanja granica državnih šuma i šumskog zemljišta, o vrsti i postavljanju graničnih znakova

Član 1.

Ovim pravilnikom uređuje se način obilježavanja granica državnih šuma i šumskog zemljišta na području Zeničko-dobojskog kantona, vrste graničnih znakova i način postavljanja graničnih znakova.

Član 2.

Pojmovi koji se koriste u ovom pravilniku imaju sljedeća značenja:

1. Pod šumom, u smislu ovog pravilnika, podrazumijeva se zemljište obraslo šumskim vrstama drveća i grmlja čija površina prelazi 1000 m² i čija je širina najmanje 20 metara i ako njihove krošnje pokrivaju više od 30% zemljišta.
2. Državna šuma i šumsko zemljište je šuma i šumsko zemljište u državnom vlasništvu.
3. Šumsko zemljište, pored zemljišta obraslog šumom obuhvata i neobrađeno, neiskorišteno ili neplodno zemljište izvan šume u onom omjeru u kojem obezbjeđuje ili potpomaže funkcije susjedne šume. Šumsko zemljište također sačinjavaju područja sa smanjenim šumskim pokrivačem, krš, čistine i livade unutar šuma.
4. Granice državnih šuma i šumskog zemljišta su linije koje razgraničavaju državne šume i šumsko zemljište od privatnih posjeda, poljoprivrednog i građevinskog zemljišta.
5. Granični znakovi su trajni i vidljivi znakovi koji se postavljaju na mjestima gdje se granična linija lomi kao i na mjestima rijeka, jezera, saobraćajnica i sl.

Član 3.

Kantonalno šumsko-privredno društvo koje gospodari državnim šumama i šumskim zemljištem dužno je da izvrši obilježavanje granica državnih šuma i šumskog zemljišta na osnovu rješenja i u roku koji odredi rješenjem nadležni organ u skladu sa odredbama Zakona o premjeru i katastru nekretnina.

Granice šuma i šumskog zemljišta u državnoj svojini obilježavaju se trajnim i vidljivim graničnim znakovima (u daljnjem tekstu "znakovi").

Član 4.

Za znakove za obilježavanje granica upotrebljavaju se:

1. 1. Betonski stub dimenzija 10x10x50 cm sa nadzemnim dijelom visine 10 cm (slika 1)
2. Grubo obrađen kameni stub dužine 50 cm sa obrađenim nadzemnim dijelom 10x10x10 cm (slika 2.);

2. Prirodna stijena sa obrađenom glavom 10x10x10 cm (slika 3.);
3. Dubeće drvo (stablo) najmanjeg prečnika 30 cm sa zatesima 10x10 cm na prsnoj visini, 1,30 m isključivo na kori (slika 4.);

Grafički prikazi (slika 1., 2., 3. i 4.) su sastavni dio ovog pravilnika.

Član 5.

Na znakovima iz člana 4. ovog pravilnika ispisuje se oznaka DŠ (državna šuma) i redni broj znaka u kvadratu 7x7 cm sa veličinom slova i brojeva koja odgovara veličini kvadrata.

Oznaka DŠ stavlja se sa vanjske strane šume ili šumskog zemljišta, a brojevi sa unutrašnje strane. Brojevi se počinju pisati u pravcu kretanja kazaljke na satu i obrojčavanje granične linije počinje sa brojem jedan i nastavlja se rednim brojevima sve do završetka.

Obrojčavanje iz stava 2. ovog člana može se vršiti po odjelima, gospodarskim jedinicama i njihovim dijelovima kao i po katastarskim općinama, a vrši se za područje općine.

Izuzev od stava 3. ovog člana, može se vršiti odvojeno obrojčavanje površina šuma ili šumskog zemljišta koje se nalazi kao enklava u kompleksu poljoprivrednog zemljišta.

Član 6.

Granični znakovi se postavljaju na mjestima gdje se granična linija lomi, kao i na mjestima rijeka, jezera i slično. Ako granična linija ide stalnim objektima (putevi, rijeke, potoci i dr.), granični znakovi se postavljaju samo na početku i na kraju tog objekta.

Ako granična linija ide potokom ili rijekom onda granica, po pravilu, ide sredinom vodotoka, ako vodotok nije međunarodni. Ako se granični znak nalazi u vodotoku ili na ušću vodotoka ne vrši se postavljanje znaka nego se postavljaju dva granična znaka na obalama, te se uz opis u zapisniku crta skica. Kada je granična linija prava, znakovi se postavljaju tako da se moraju dogledati.

Član 7.

Kantonalno šumsko-privredno društvo koje gospodari šumama dužno je: da poslije postavljanja znakova izvrši geodetsko snimanje znakova jednom od geodetskih metoda premjera oslonjenih na stalne geodetske tačke. Podaci snimanja znakova moraju biti takvi da se na osnovu njih može izvršiti kartiranje i ucrtavanje znakova na katastarskim planovima i izvršiti promjene kroz katastarski operat, kao i da se na osnovu tih podataka mogu ponovo, u granicama tačnosti snimanja, postaviti znakovi u slučajevima spora oko granica ili ako su znakovi uništeni.

Član 8.

Za sve što nije regulisano ovim pravilnikom, primjenit će se zakon.

Član 9.


Ovaj pravilnik stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 05-26-23935/13

Datum: 13.11.2013.godine, Zenica (**Bojan Bošnjak, s.r. – ministar**)

MINISTARSTVO POLJOPRIVREDE, VODOPRIVREDE I ŠUMARSTVA ZENIČKO
- DOBOJSKOG KANTONA

(Službene novine Zeničko – dobojskog kantona br. 474)



Prilog 1. Grafički prikaz znakova za obilježavanje granica državnih šuma i šumskog zemljišta